

## Walspezial 3/5 : Fuerderunge bis 2030

# Schoulqualitéit a Schoulentwécklung

### Reform op deenen ënneschte Klassen am ESG

D'FÉDUSE-CGFP fuerdert méi streng a méi kloer verständlech Promotiounskrittäre fir déi ënnescht Klassen am ESG. Am Fall vu schlechter Leeschtunge vun engem Schüler sollen d'Méiglechkeeten ugepasst gi fir, jee no Situatioun, eng obligatoresch Reorientatioun, oder aner pedagogesch Moosnamen z'ergräifen. Och d'Krittären, déi zu engem Redoublement féiere sollte verschäerft ginn. Dëst ass déi éierlechste an transparentsten Aart a Weis fir de Schüler an hiren Elteren ze weisen, wou si tatsächlech en cours de route stinn, ouni déi zukünfteg Orientatiounsméiglechkeeten no der 5G vun de Schüler vu vireran ze hypothekéieren.

### Valorisatioun vun der Berufsausbildung

Vill ze dacks landen d'Schüler net aus Iwwerzeegung an der Berufsausbildung, mee well hinnen alternativ Weeër opgrond vun net errechten Zougangskrittäre verspaart bleiwen. D'FÉDUSE-CGFP fuerdert e Paradigmewiessel an der öffentlecher Duerstellung vun der Formation professionnelle, besonnesch well sech ofzeechent, dass d'Handwierk ee vun de Beräicher ass, an deem de Mënsch kuerz- a mëttelfristeg am mannsten duerch kënschtlech Intelligenz kann ersat ginn. Doduerch wäert d'Nofro u qualifizéierte Leit am Handwierk tendenziell weider klammen. An eisen Ae soll d'Erhéije vun der Wäertschätzung vum Handwierk an eiser Gesellschaft eng vun den Haaptprioritéite vun der Regierung ginn. D'FÉDUSE-CGFP ass jiddefalls gäre bereet dobäi ze hëllefen, an engem nationalen Aktiounsplang déi gesamt Berufsausbildung op de Leescht ze huelen an déi néideg Reforme mat unzestoussen.

### Stärke vum traditionellen nationale Schoulsystem

Als Haaptantwort op déi demographesch Entwécklung gëtt momentan virun allem op öffentlech Europaschoule gesat, déi sech am Laf vun de leschte Joren als konkurrent Parallelwelt zur traditioneller Schoul etabléiert hunn. Ëmmer méi Schüler erkennen, dass dëse Curriculum fir si eng méi kamoud Alternativ um Wee zu engem Ofschlossdiplom ka sinn, virun allem opgrond vun deene vill méi kulante Bewäertungs- a Promotiounsmodalitéiten an och der Flexibilitéit a punkto Sproochen. D'Äquivalenz vun dësen Ofschlossdiplomeren zu deene vum ESC an ESG muss eiser Usicht no ganz kritesch hannerfrot ginn.

Amplaz weiderhi primär op den Ausbau vun öffentlechen Europaschoulen ze setzen, mécht d'FÉDUSE-CGFP sech dofir staark, dass endlech och déi grouss Erausforderungen am traditionelle Schoulsystem an engem kohärente bildungspolitesche Konzept sollen ugepaakt ginn. An eisen Aen ass et heibäi vu gréisster Wichtigkeet, dass Lëtzebuerg erëm ganz d'Kontroll iwwert d'Léierpläng an d'Bewäertungskrittären iwwerhëlt. Dës gi bei den öffentlechen Europaschoulen nämlech aktuell zu Bréissel festgeluecht a sinn deemno net spezifesch op d'Besoinen vun eiser Gesellschaft an net op eise lokalen a regionalen Aarbechtsmärché zougesechniden.

### **Kohärent Strategie am Ëmgang mat KI (och am Kontext vun den Noexamen)**

Den Ëmgang mat kënschtlecher Intelligenz ass net nëmmen an der Schoul eng vun de gréissten Erausforderungen an deene kommende Joren. Beispillsweis ass et am Zäitalter vun ChatGPT definitiv net méi ubruecht, dass den Dossier, deen e Schüler am Kader vun engem Noexamen iwwert d'Summervakanz doheem ausschafft, fir d'Promotioun matzielt. De Comité vun der FÉDUSE-CGFP fuerdert d'Ausschaffe vun engem nationale KI-Aktiounsplang fir den Enseignement a wëll vun Ufank un inhaltlech enk mat agebonne ginn.

### **Qualitéit vum Stage**

D'FÉDUSE-CGFP verlaangt, dass d'Reform vum Stage vun 2019 grëndlech evaluéiert gëtt an déi Upassunge gemaach ginn, déi sech opdrängen. Beispillsweis fanne mir et immens onglécklech, dass e Stagiaire a just engem Ordre d'enseignement ausgebilt gëtt an no sengem Stage an een anere System schaffe geet.

### **Geplangte Reform zum Ofschafe vun de Sektioenen am ESC**

Nodeems an deene leschte Joren ëmmer méi nei Sektioenen an d'Liewe geruff goufen – esouwuel am ESC ewéi och am ESG – gesäit den aktuelle Koalitiounsaccord elo op eemol d'Ofschafe vun de Sektioenen am ESC vir. D'FÉDUSE-CGFP fuerdert, vun Ufank u ganz enk an dëse Reformprozess an déi verschidde Pilotprojeten an dësem Zesammenhang mat agebonnen ze ginn.

*Lëtzebuerg, den 2. Mäerz 2025*

D'KANDIDATE VUN DER CGFP-FÉDUSE

**LËSCHT 1**



**GUIRSCH**  
Mona

Professeur d'allemand à l'Athénée  
Secrétaire générale et Trésorière FÉDUSE  
Membre du Comité fédéral de la CGFP  
Attachée à la direction et déléguée SFA  
Formatrice IFEN  
Assesseur élu de la CHFEP



**HEYMANS**  
Bob

Professeur de mathématiques au LJB  
Membre du comité de la FÉDUSE  
Membre suppléant du Comité fédéral de la CGFP  
Membre de la CNESC – mathématiques



**KOHNEN**  
Gilles

Professeur de chimie au LAM  
Secrétaire de la FÉDUSE  
Membre du comité fédéral de la CGFP  
Conseiller didactique et formateur à l'IFEN  
Membre élu de la CHFEP



**SCHOLTES**  
Raoul

Professeur de biologie au LCE  
Président de la FÉDUSE  
Membre du Comité fédéral de la CGFP  
Président de la CNESG - Sciences naturelles  
Vice-Président du Conseil Supérieur de l'Éducation nationale

D'Walziedele musse **bis den 26. Mäerz erëm zeréck am Walbüro** sinn.

Dofir schéckt Äre Vote fréi genuch fort  
an erënnert och Är Kollegen heirun!

**Duerch all Är 4 Stëmmen: Staark fir d'Enseignanten!**